

Meriahkan Hari Kebangsaan

Lebih 20,000 rakyat Selangor dijangka hadir pada Sambutan Hari Kemerdekaan

HASNIZA HUSSAIN

SHAH ALAM

Lebih 20,000 rakyat Selangor dijangka hadir memeriahkan majlis Sambutan Hari Kemerdekaan peringkat negeri Selangor yang akan diadakan di Dataran Kemerdekaan di sini pada jam 9 malam 30 Ogos ini.

Setiausaha Bahagian Khidmat Pengurusan Pejabat Setiausaha Kerajaan Negeri, J K Gayathri Prasena berkata, majlis sambutan kali ini yang bertemakan Sayangi Malaysiaku

Sayangi Malaysiaku

itu akan dihadiri oleh Menteri Besar Selangor, Amirudin Shari, Ahli parlimen, Adun termasuk ketua jabatan dan kakitangan kerajaan negeri Selangor.

Beliau berkata, turut disediakan pelbagai acara menarik seperti per-

barisan dan perarakan kontinen, persembahan kesenian dan kebudayaan, persembahan oleh Angkatan Tentera Malaysia (ATM), nyanyian dari artis terkenal Hael Hussaini serta Emi Zakri termasuk bacaan ikrar serta pertunjukan bunga api.


Menurutnya, bagi acara perbarisan serta perarakan kontinen pada tahun ini, pihaknya mendapat sambutan luar biasa iaitu sebanyak 62 penyertaan dari pelbagai agensi/jabatan kerajaan negeri dan persekutuan Selangor.

"Tahun lalu hanya 57 kontinen sahaja yang menyertai tapi tahun ini kita dapat lima penyertaan baru dari kontinen Universiti Kebangsaan Malaysia (UKM), Universiti Putra Malaysia (UPM),

Tourism Selangor, Jabatan Perpaduan Negara dan Integrasi Nasional Selangor serta Jabatan Pendidikan Selangor.

"Kita percaya peningkatan penyertaan ini bukan saja disebabkan semangat patriotisme yang tinggi di kalangan mereka tapi juga oleh publisiti meluas yang dibuat lebih awal pada kali ini, "katanya kepada Sinar Harian, semalam.

Katanya, bagi acara perbarisan dan perarakan itu, sebanyak tujuh



Gayathri menunjukkan sebahagian daripada senarai 62 kontinen yang akan menyertai perbarisan dan perarakan Hari Kebangsaan pada tahun ini.

kategori kontinen dipertandingkan iaitu kategori jabatan kerajaan, pejabat daerah dan tanah, pihak berkuasa tempatan (PBT), badan berkanun, swasta/GLC/NGO, pasukan pancaragam sekolah serta kategori jabatan kerajaan beruniform.

"Setiap kontinen yang memenangi kategori terbabit bakal menerima tunai RM2,000 bagi tempat pertama, RM1,500 (tempat kedua), RM1,000 (tempat ketiga), manakala tempat keempat sehingga keenam akan mendapat hadiah saguhati berjumlah

RM500.

"Selain itu, kita jangka persembahan oleh pasukan ATM juga seperti kawad senyap serta pertunjukan army red warrior pasti tidak akan mengecewakan semua yang hadir pada malam tersebut" katanya ketika sesi temubual bersama Sinar Harian, semalam.

Gayathri berkata, dari segi persediaan untuk keselamatan pada program itu nanti, seramai 200 anggota Polis Diraja Malaysia (PDRM) serta pengawal kebangsaan Majlis Bandaraya Shah

Alam (MBSA) akan ditempatkan bagi mengawal lalu lintas serta orang ramai.

Beliau berkata, orang ramai yang ingin menyertai sambutan tersebut disyorkan untuk menaiki pengangkutan awam dan perkhidmatan bas Smart Selangor turut disediakan dari laluan 3 iaitu di Seksyen 19 (Stesen Komuter Shah Alam) terus ke kawasan di belakang Maybank Seksyen 14, yang terletak kira-kira 100 meter dari Dataran Kemerdekaan.

Katanya, bagi yang membawa kereta sendiri boleh meletakkan kenderaan masing-masing sama ada di kawasan Masjid Sultan Salahuddin Abdul Aziz Shah, Wisma PKPS, UTC Shah Alam atau di kawasan sekitar Stadium Shah Alam.

"Kita galakkan orang awam untuk datang awal bagi mengelakkan kesesakan termasuk memudahkan urusan untuk parkir," katanya yang turut menggalu-alukan orang ramai yang ingin memakai pakaian tema kemerdekaan termasuk membawa jalur gemilang sendiri. Katanya, sebanyak 20 food-truck akan beroperasi di sekitar Dataran Kemerdekaan, selain kemudahan bilik air serta tempat solat turut disediakan buat orang ramai.

Majlis sambutan Hari Kebangsaan peringkat Selangor kali ini turut mendapat kerjasama daripada pelbagai agensi lain antaranya PDRM, ATM, PBT, Tourism Selangor, Jabatan Pendidikan Selangor, Jais serta JKR.